


**Ngu jo cjua xi chja  
xujun changá tsëhë Nina XIV**

**Historias del Antiguo Testamento XIV  
Esdras - Job, Proverbios, Hageo - Malaquías**



en el mazateco de Chiquihuitlán de Juárez



**Ngu jo cjua xi chja  
xujun changá tsëhë Nina XIV**

**Historias del Antiguo Testamento XIV  
Esdras - Job, Proverbios, Hageo - Malaquías**



**Las ilustraciones en las páginas 2 - 14 y 16 al fin son propiedad de la Fundación David C. Cook,  
usadas con permiso.**

Primerá edición  
Historias del Antiguo Testamento XIV  
en el mazateco de Chiquihuitlán de Juárez  
México, D. F. .6C  
Febrero de 1994

## **Historias del Antiguo Testamento XIV**

### **Tsindaja xuta tjë rë Israel yungun rë Nina ngajan Jerusalén**

**(Esdras 3-6; Hageo 1-2)**

Hya xi cavisehen sa xi má yatu tséhë nu xi cavuya xuta nanguí Judá ne, casahmitangun me nandya Jerusalén cojo sa xi cuma sahmi me suhi xi hmí rë suhi rë ndihya tsjian. Hya ne, chaja sa cavetsihin tsindaja me yungun Peru Jesúa, nahmi xi matitjun, cojo Zorobabel, me tjun rë xuta tjë rë Judá ne, catsindaja me ngu ngasunscun hiscan xi caviyuju ngasunscun jyë ngajan ndatsen yungun. Xcun ngasunscun vë cama casua me cjuatjo sacuaha meje rë tséhë suhi vë tu cutjin cavitexa Nina nima Moisés xi meje rë xi chichihin cumá.

Sehe hya xi cavisehen sa xi má jo tséhë nu xatsë ne, Jesúa cojo Zorobabel ne, casahmi tangun me yëjë xuta, hane casua me xa cojo sa xi cuetsihin me tsindaja me yungun. Hya xi camá ne, camá xihndënaña rë. Hya ne, jemu ndama rë xuta. Xuta nahmi ne,



catsijane me tyjo, hane xuta levita ne, cavajacoo me tyava tsin rë  
me. Hane casë me xi casahmi hnga casahmi jyë me Nina.

Ngajan nandya Jerusalén secjan xuta tjë rë Israel xi sehe cavuya me cojo xuta xin xi cavisehen me ngajan hya xi cacaă rë me xi matitjun rë Asiria xcun ngu si. Hya xi cavutsejen xuta xin jan xi tijima yungun ne, cachja xu me xi cuisecoo me xicjin me ta hacuaha macjain rë me Nina. Peru xuta tjë rë Israel ne, chuyiin rë me cjua ndacha vë. Cachja me xi miji rë xi xuta xin sahmi me ta sahmi me suva me sacuaha cachja Ciro, me xi matitjun. Hya xi camá ne, xuta xin jan ne, cavanguise me chuva rë hacutjin sahmichuva me cjuatacun rë xuta cojo sa xi sahmii sa me xa jan. Xuta xin jan ne, casua me tujún xutaxa rë persa xi choho cuichja me tséhë xuta tjë rë Israel. Hacuaha catsihindu me ngu xujun, hane cavinchajyë me xuta tjë rë Israel ta cachja me xi tijima me condra rë me xi matitjun rë xuta persa. Hya xi camá ne, xuta matitjun jan ne, cahndë me cjua rë xuta xin jan, hane casuaain me cahndë xi cjuenduju xa. Hisca xi cavisehen me xi hmí rë Darío xi majo ne, sehe casacu nga cahndë xi cuma xa.

Jinguyëjë rë xi cavitexa Darío xi majo ne, catsingatju Nina jo profeta xi cuichja me cojo xuta tjë rë Israel. Ngu profeta jan ne, Hageo hmí rë hane ngu ne, Zacarías hmí rë. Ngu ndiya ne, cuitjin

cachja Hageo cojo Zorobabel cojo Jesúa, jo me xi cafaha me xa xi cuitexa me xuta xcun xa rë yungun xi tijima:

—Chja xuta tjë rë Israel xi chaja sa cuechu nixtin xi cuya sahmi me xa xi tsindaja me yungun xi cuma ndava Nina Peru ndava suva me ne, jemu ndajyihi. Ndajintjin. Ngatsë rë cjuatacun vëhë ne, casuaain Nina cahndë xi cuaha tsi xcun xitjë rë me, hane tsajin tsëhë me xi ndaja cavatju. Suaain xitjë rë me, hane stetaain xi fanga me, stetaain tu xi vatë me, hacuaha cjuecanii rë tsjian rë me. Mameje rë xi sacuya rë me chuva rë hacutjin sahmi me yungun. —Cuatjin cachja Hageo.

Hya xi camá ne, Zorobabel cojo Jesúa cojo yahnga xuta ne, canuhya rë me cjua jan ta cafehe tsëhë Nina. Sehe cachja Hageo cuitjin:

—Xicarcuun nihñuchuhun cjua vi ta Nina ne, cuisecoo nuju.

Hane cojo cjua vëhë ne, quiij rë xuta cjuasua xi cuetsihin tsindaja nga me yungun ta catsingatju Nina cjua. Hane cahntsua ngu jo totje ne, ha cavetsihin nga xa vë.



Hya xi camá ngu sa xi tijima xa ne, cachja nga Nina cojo Hageo  
cojo sa xi sua me ngahňu cjuatacun rë xuta. Cuitjin cachja me:

—Xa xi ha camá canihňu hisca quihndë ne, jemu va tsejen xi  
cuma hacutjin cavutsejen yungun hatsëë nixtin. Peru tijima, hane xi

cuijnetaha xa ne, hitsë sa ndajyihì cuma rë xi cama rë yungun vë,  
hane yungun xi nihñu ne, ngajan cuitejñacahndë.

Quijinduju xa vë, hane xi camá jo sa sa ne, cachja Nina cojo  
Hageo xi cuichja me cojo xuta xi sacu rë me cjuandaja rë Nina, hane  
ndaja cuatju me quihndë ta cahndë me cjua rë Nina, hane titsindaja  
me yungun.

Ngajan nangui Israel siu xutaxa rë xi tjë rë xuta persa ta  
fahacuenda me nangui hacuaha cjuaha me tujúsa. Xutaxa rë jan ne,  
choho vëë me xuta tjë rë Israel. Hya xi camá ne, cavutsejen me xi  
tijima xa vë, hane ngutjen cafehe me cavinenguise me xuta yo xi  
casua rë me cahndë xi cuya cuma nga xa. Hane cachja xuta xi nima  
Ciro cavitexa me me xi sahmi me xa vë. Sehe xuta condra rë me jan  
ne, catsingatju me cjua cojo Darío xi majo tsëhë xa xi tijima. Cachja  
me sacuaha cachja xuta tjë rë Israel. Sehe cachja me xi ndatjin sa xi  
vutsejenndaja xutaxa rë Darío cojo sa xi tsejen sa xi quixi xi cachja  
xuta tjë rë Israel. Cuatjin casahmi me peru jinguyëjë rë xi cuya cjua  
rë Darío ne, quijinduju xa, hane ndaja tijima ta tivisecoo Nina me.  
Hane xi cafahatsja Darío xujun, catsingatju me xuta rë me xi

cuanguise me sa xi cavaxë jain Ciro xujun jan. Hane casacu rë me xujun. Sehe catsingatju Dario cjua xi cuma cjuenduju xa hacuaha cojo tujúsa xi cavechjijte xuta ngajan ne, sua xutaxa rë xi tsicojo xuta tjë rë Israel tséhë xa jan. Cojo cjua rë Dario vë ne, casahmi me nguyjë xi xutaxa rë jan ne, cuisecoo me xuta tjë rë Israel. Cuatjin camá xi cajnetaha yungun nu xi ma jyun xi cavitexa Dario.

Hya xi cajnetaha xa ne, casahmi xuta tjë rë Israel ngu suhi cojo sa xi yungun vë cuma tséhë Nina. Cjín chu catsiquehen me chu xi casua me cjuatjo cojo Nina. Hane jemu ndama rë yëjë xuta. Sehe casua xa me nahmi cojo xuta levita xi cuisehen me xa yungun sacuatjin cavitexa Nina nima Moisés. Hane hya xi camá nu xatsë ne, hya xi satë rë nixtin rë suhi rë Pascua ne, ngajan yungun jan cavaxë me suhi. Jemu ndama rë xuta xi cojo cjuandaja rë Nina ne, cama catsindaja me yungun.

## **Cachja profeta Zacarías cjua rë Nina cojo xuta xi cafehe me caviyuju me nandya Jerusalén**

(Zacarías 1-14)

Nu xi cachja Hageo cjua rë Nina cojo xuta tjë rë Israel ne,  
hacuaha cachja Zacarías cjua rë Nina cojo me. Cuatjin cachja me:

—Chja Nina xi sa xi cuinuhyan tsëhë cjua rë me, hane  
tjengueen xcusun rë xutachanga naja ne, cuisecoo me yaan cojo sa  
xi ndaja cuatjun cuma. Xutachanga naja ne, casacu rë me cjua rë  
Nina ta jemu cjin má profeta xi catsingatju Nina xi cachja cojo me,  
peru caveni cachja profeta ta catsindeyaain me cjuatacun rë me.  
Vëhë xi cama me castigu ta cavatju me yëjë ni sacuaha cachja Nina  
xi cuatju me sa xi cuihndiin me. Cuatjin camá me hisca camachaya  
rë me xi castigu xi casatë rë me ne, camá chjí rë jyë rë me.

Cachja Zacarías hacutjin mameje rë xi sahmi xuta hane hacuaha  
cachja chini cojo me tsëhë xcusun xi cumá ngasca. Ngu jo chini  
cachja tsëhë xi nandya Jerusalén ne, cumá nga ngu nandya hñu  
hacuaha ndaja cumá tsëhë xuta nandya jan. Ngu ndiya jan ne,




cachja me xi ngu me matijun tséhë  
nandya Jerusalén ne, cuinduva me  
quisun me ngu burru sacuaha fi tu  
yo ni xuta ngarca, peru cuitixa me  
yéjë ngasunhndë.

Ngu ndiya nga cachja Zacarías  
cjua rë Nina xi cuitjin chja:

—Cuechu nixtin xi xuta tjë rë Israel ne, scuëë me me xi  
caxtengui rë quicha hane jemu chocho cuma rë me.


Cachja me xi tsinchataha Nina yéjë jyê rë me, hane cuaxë me  
yéjë nina ndyojo xi siu nangui Judá. Cachja me xi cuejña Nina xcun  
naxi xi hmí rë Olivo hane naxi jan ne, cuma jo cahndë. Sehe sahmi  
Nina gubiernu xuta ngasunhndë. Hya ne, cuma castigu rë yéjë xuta  
condra rë xuta tjë rë Israel. Hane hya ne, tsajin nixten ta handasa xi  
fi hora ne, hasen tsejen.



**Na Ester ne, camá na chjuun rë me xi matitjun rë  
Persia, hane casahmi na xi cavatjuhnga xuta tjë rë  
Israel tséhë xuta xi meje tsiquehen rë me**

(Ester 1-10)

Cafehe ngu nu xi ngu me xi hmí rë Asuero camá me me xi matitjun rë nangui Persia. Hya xi camá ne, Asuero vë ne, casahmi me ngu suhi jyë hane ngajñi rë cjuasua jan ne, cajindaya me chjuun rë me, na xi hmí rë Vasti. Peru cachuyiin rë na hane quiijiin na. Hya xi camá ne, xutaxa rë xi sua cjuatacun cojo me xi matitjun jan ne.



cachja me xi ndajintjin xi na vë má na chjuun rë me ta cahndiin na.  
Cachja me xi hitsë sa ndaja sa xi cuaxijin me ngu na xi cuisehen  
cahndë rë Vasti ta sa tsajin ne, tsajin ngu chjuun xi cuihndë na tsëhë

xihin rē na. Hya xi camá ne, cachuya rē Asuero cjua vē, hane catsingatju me xutaxa rē me xi cjue jaha me yējē ni yachjin ndacun cojo sa xi ngajñi rē yachjin jan ne, sacu rē me ngu xi chuya rē me.

Ngajan nandya Susa, o sa nandya rcun rē Asuero ne, tjin ndava ngu xuta tjē rē Israel xi hmí rē Mardoqueo. Hane Mardoqueo jan ne, catsicha me ngu hndixahan xi hmí rē Ester, quihndi rē nima tsini rē me. Jemu ndajyihi na. Hya xi cavutsejen xutaxa rē Asuero na ne, quiji me cojo na ndihya rcun, hane ngajan cavejña na cojo yahnga yachjin ndacun. Ndaja camá tsēhē na ta me xi casahmi me cuidadu rē yachjin jan ne, cachuya rē xcusun rē na. Hviin me xi xuta tjē rē Israel má na Ester ta tsajin yo xi cachja na cojo ta cachja Mardoqueo xi cuichjaain na tsēhē tjē rē na. Jinguyéjē rē xi tacun na ndihya rcun ne, nchunchujun ni catsuyihiya Mardoqueo xcun ndihya jan cojo sa xi sacu rē me cjua tsēhē Ester. Hya xi tjin rē ngu nu xi tacun Ester ngajan ne, casatē rē na xi cuiyujun na ngu nixten ni cojo me xi matitjun ta cuatjin ngu ngu nixten casatē rē jimangu yachjin jan. Hane me xi matitjun jan ne, hitsē sa cachuya rē me na Ester xi cuma rē yahnga yachjin jan, hane camá na chjuun rē me. Peru hisca suva me xi matitjun jan ne, hviin me xi xuta tjē rē Israel má na.



Mardoqueo ne, quijinduju me cafehe me ndihya rcun xi sacu rë me cjua rë Ester. Ngu ndiya xi cafehe me ngajan ne, cavihndë me cjua rë jo cha sindadu xi meje tsiquehen cha me xi matitjun jan. Ngajan xi cachja me cojo na Ester, hane sehe casua na camachaya rë me xi matitjun tséhë cjuacjintacun vë. Asuero ne, cavanguisehma me cjuaquixi rë, hane quixi xi cachja Ester. Hya xi camá ne, cavitexa me xuta rë me xi cafaha me jo sindadu jan, hane cavityangui xuta yojo rë cha hisca cahme cha ta cuatjin xcusun rë me hya xi casahmi me castigu. Hacuaha cavitexa me xi yëjë

cjuacjintacun vë ne, catsihindu xuta rë me cahntsua libru xi chja tsëhë yëjë ni xi cavatju xcun gubiernu rë me.



Asuero ne, tjin rë me ngu xutaxa rë xi hmí rë Amán. Hyá xi camá ne, quiji tjun Amán xi cuma rë yahnga xutaxa rë. Hisca xi cavitexa Asuero xi yahnga xutaxa rë ne, vixcunhnchi me xcun Amán. Hane cuatjin camá. Peru Mardoqueo, sacuaha xcusun rë xuta tjë rë Israel ne, hatuxa cuixcunhnchiin me xcun ngu xuta. Hyá xi camá ne, jercu cama xti rë Amán hisca meje tsiquehen me yëjë xuta tjë rë Israel. Sehe sacuaha tjin xcusun rë me ne, cavaxë me

suerte cojo sa xi tsejen mé nixtin xi hitsë ndaja xi sahmi me cjuañihi  
 vë. Hane cachja suerte mé nixtin cumá. Sehe quiji Amán  
 cavinchajyë me xuta tjë rë Israel xcun Asuero ta nangui xi vitexá  
 Asuero ne, jemu siu xuta tjë rë Israel. Cachja Amán ta xuta vëhë ne,  
 vihndiin me ley rë nangui hisca cavyuju me hane meje rë xi cueya  
 yëjë ni me. Hane casua Asuero cahndë xi sahmi Amán hacutjin  
 meje rë me, hane cuaxë me ngu acta xi chja xi cueya xuta jan.  
 Hisca casua me me xtungun rë me xi má sellu xi tine rë acta vë cojo  
 sa xi cuetju Jain cjua vë. Hya xi camá ne, cavaxë Amán acta vë  
 hane catsingatju me cjua jinguju yë ni cahndë xi tacun ngahma  
 gubiernu rë Asuero. Cachja xujun jan xi nixtin xi cavaxijin suerte  
 vë ne, hya tsiquehen me xuta tjë rë Israel.

**Hya xi camachaya rë**  
**Mardoqueo cjucjintacun vëhë ne,**  
**jemu chocho camá rë me hane**  
**sacuaha xcusun rë xuta hya xi chocho**  
**má rë me ne, cavaja me tsjan**  
**sacuaha tsá naxa hane catsufë me ndesu xcun vë.** Sehe cavejña me  
**tingotjo ndihya rcun ta cumajin cuisehen me cojo tsjian vë.** Hya xi

Esta ilustración  
 no está  
 disponible.

camá ne, na mosu rë Ester ne, cachja na cojo Ester xi cuatjin jyihí me hane jindayatë me ta choho ma rë me. Sehe cavitexa Ester na vë xi cjue ngu cha mosu cuinenguise cha me mé ma rë me. Hya xi camá ne, Mardoqueo casua camachaya rë na tséhë xujun jan.

Catsingatjun me ngu xujun xi cavaxëtaha me, hane cachja me xi meje rë xi cuichja na ngatsë rë xuta rë na xcun Asuero. Hya xi cafahatsja Ester cjua vë catsicuya na cjua xi jemu tsavi xi sahmi na sacuaha chja me ta tsajin yo xi cuma cuisehentë ni cuichja cojo me xi matitjun, ta suva me xi cajindaya me xi matitjun ne, me vëhë cuma cuisehen me. Cachja na ta ha meje ngu sa xi casacu rë na cahndë xi cuisehen na ngajan. Cachja na ta sa xi cuisehentë ni ngu xuta ne, tjin rë me xi cueya me. Suva cueyaain me sá xi sahmi me xi matitjun cjuandaja hane sacuaha

seña rë cjuandaja vëhë ne, tsixinga me quicha rë ngahñucjua rë me. Cjua vë xi catsingatju Ester Mardoqueo. Sehe cachja Mardoqueo xi sahmi nguyjë xi sahmi na. Cachja me xi venguichjiin rë xi ndihya rcun tacun na ta cojo na cueya na sa xi jyuu ni cuejña na.



Cachja me xi tjin yo xi cuitexa Nina xi cuisecoo xuta rë me, sa xi hacuiin na Ester ne, hacjahi xuta sahmi me. Peru hya ne, choho cuatju na. Cachja me xi tsejen sacuaha xi casua Nina na cahndë xi cafaha na xa sacuaha chjuun rë me xi matitjun cojo sa xi cuisecoo na xuta rë na. Hya xi camachaya rë na cjua vë ne, catsingatju na cjua vi:

—Ndatjin. Cuma xi nújun. Peru chaja sa xi cuisehen ngajan ne, nihñutangun xuta naja xi siu me nandya vihi, hane nechun xun rë Nina jyan nixtin, chjayun rë Nina xi sacu ná cjuandaja rë me xi matitjun. Hane hacuaha cuitéjña xun cojo na mosu naha.

Hya xi camá ne, cafahatsja Mardoqueo cjua vë, hane casahmi me sacuaha cafehya na Ester.

Hya xi cajnetaha nixtin vë, cavitexa na Ester mosu rë na xi sahmi me ngu comida ndaja cojo sa xi ngajan sinë me xi matitjun cojo Amán. Sehe cavaja na tsjian xi satë rë chjuun rë me xi matitjun hane quiji cavejña na tingotjo rë cuartu rcun. Hya xi camá ne, catsixinga me quicha rë ngahñucjua rë me hane casacu cahndë xi cavisehen na. Sehe cachja me xi matitjun cuitjin:



—Noje mé xi meje ri ta hatuxa suá ri.

Ngajan xi cachja na xi camá ngu comida, hane meje rë na xi cuinduva me cojo Amán sinë me niñu. Ngajan xi catsingatju me cjua rë Amán xi cuinduva me, sehe quiji cajinë me niñu. Sehe cavinenguise nga me na mé xi meje rë na. Hane cachja na xi sahmi me cjuandaja xi cuinduva nga me nchujun ni xi sinë me niñu, hane sehe cuichja quixi na mé xi meje rë na. Hane cachja me xi joho, cuma cuatjin.

Sehe quiji Amán ndava me, hane ndiya cjue me ne, cavechutaha me Mardoqueo. Hane sacuaha xcusun rë Mardoqueo ne,,

cavixcunhnchiin me. Ngajan xi jemu cama xti rë Amán, peru tsajin mé casahmi me. Hya xi cafehe me ndava me cavetsihin xi cavaxë ndaja me yojo rë me ngatsë rë cjuanchina rë me cojo xa xi casatë rë me. Sehe cachja me cojo xuta rë me xi casatë rë me xi suva me cajinë me cojo me xi matitjun comida xi casahmi Ester. Hacuaha hacuanitjin ni cumá nchujuni. Peru cachja me xi caveni xi jemu ndaja tijima rë me ta jercu maxti rë me ngatsë rë cjuahngatacun rë Mardoqueo, ta tsajin rë me cjuasua jinguyéjë rë xi sahmi Mardoqueo xa rë me xi matitjun. Ngajan xi xuta rë me jan ne, cachja me xi sa xi cuatjin ne, cuma cuitexa me cha chjineya xi sahmi cha ngu cahndë hisca cuityangui xuta Mardoqueo hisca xi cueya me, hane sehe cuma xi tacun chjine xi cuma nchujuni. Hane hya ne, cuehya Amán cahndë cojo me xi matitjun xi ngutjen cueya Mardoqueo. Hya xi camá ne, cachuya rë Amán cjua vë, hane cuatjin casahmi me.

Nixten vë ne, camajin cafañafë me xi matitjun. Sehe cavitexa me mosu rë me xi cjuejaha me libru xi chja tséhë yéjë ni xi cavatju xcun gubiernu rë me. Hane libru vëhë cavetsihin cavutaya mosu jan. Hya xi camá ne, cavutaya mosu hisca chja tséhë hya xi cavaxëtje Mardoqueo yojo rë Asuero tséhë sindadu xi meje



tsiquehen cha me. Hane xi cavitsjen rë Asuero tsëhë nixtin hya ne, cavinenguise me sa xi tjin mé xi ndaja xi casacu rë Mardoqueo ngatsë rë cjuandaja vë, hane cachja mosu xi ndastu me casacu rë Mardoqueo. Sacuaha hya ne, cavisehen Amán ngajan hane me xi matitjun cavinenguise me Amán mé xi ndaja cuma tsëhë ngu xuta xi jercu ndaja vëë me me xi matitjun.

Xi ma rë Amán ne, tichja me xi matitjun tsëhë suva me. Vëhë xi cachja me cuitjin:



—Xi ndaja ne, tuhun rë me  
 tsjian ndaja nuju cojo quicha tyjava  
 xi sesun rcun hane cuijin me naxin  
 nuju. Hane xi cuatjin jyihí me ne,  
 tsuyihiya me ndiya nandya cojo ngu  
 xutaxa rë tsujun xi squindaya cuitjin:  
 “Chutsujun hacutjin sahmi me xi  
 matitjun cojo sa xi cuaxëndaja me  
 xuta xi ndaja scuëë me.”

**Sehe cuitjin cachja me xi matitjun:**

—Ndatjin nújun. Tangun tuhunchjinu yëjë vë sehe chjuhun  
 Mardoqueo, me xi tjë rë xuta tjë rë Israel má me, hane nihñuchuhun  
 cjua xi canújun.

Cuatjin camá xi casatë rë Amán xi cavaxëndaja me Mardoqueo.  
 Quiji jaha me Mardoqueo sehe cavaja me tsjian rë me xi matitjun



cojo yéjë sa sacuaha caveyanangu me. Sehe catsujihiya me xcun chu hiscan camiji Mardoqueo, hane cavaxë ndaja me me cachja me cuitjin: “Chutsujun hacutjin sahmi me xi matitjun cojo sa xi cuaxëndaja me xuta xi ndaja scuëë me.” Hya xi camá ne, Amán ne, cavuya me ndava me. Jemu choho má rë me. Sehe cachja me cojo xuta rë me hacutjin cavatju me. Ngajan xi cuitjin cachja chjuun rë me cojo xuta rë me:

—Hai, sa xi xuta tjë rë Israel má cha vë ne, scaain ri xcun cha. Cahndë xi choho cuma rë cha ne, choho cuma ri.

Hya xi camá ne, jinguyéjë rë xi tichja me cojo xicjin me ne,  
 cafehejaha mosu rë Asuero Amán xi cjue sinë me niñu ndava Ester.  
 Hya xi cafehe me ndava na, hane hya xi tihvi me xan rë uva ne,  
 cavinenguise me xi matitjun mé cjuandaja xi meje rë Ester. Sehe  
 cachja na cuitjin:

—Sa xi nihñu cjuandaja ne, tuhun cahndë xi cueyaan hacuaha  
 tuhun cahndë xi cueyaain xuta na. Sa xi tu caviteña me yin xi  
 cuma niji mosu hndixahan ne, tsajin mé tsöhë xi sahmendya nuju,  
 peru hacuiin cuatjin ta tsiquehen xuta ngayéjë ni ngayin.

Ngajan xi cavinenguise me xi matitjun yo xuta xi meje  
 tsiquehen rë me. Hane cachja na cuitjin:

—Jemu choho tjin ta  
 cha Amán vi casahmi cha  
 condra niji.

Hya xi camá ne, jercu  
 catsacun camaha ni Amán.  
 Hane sacuaha me xi



matitjun ne, cavisatjehnga me, quiji me ndatsen cojo cjuaxti rē me xi tsingatahacacun me hacutjin sahmi me. Ngajan xi camachaya rē Amán xi cuma me castigu hane cavetsihin xi cachjayuma me cojo Ester. Hane hora xi tifehya me cjuandaja rē na ne, quijivaha me sillan duju hisca jiñia Ester. Hya xi camá ne, cavisehen nga me xi matitjun cuartu vē hane jemu choho tsejen xi cuatjin vejña Amán. Ngajan xi hitsē sa camá cjan rē me xi matitjun. Hya xi camá ne, ngu mosu xi tacun hya ne, cachja cha cojo me xi matitjun tséhē xi tacunya ngu cahndē hisca meje cuityangui Amán Mardoqueo hisca xi cueya me. Hane cachja Asuero xi ngajan cuityangui me Amán. Hane cuatjin camá. Sehe casacu camachaya rē me xi matitjun xi Mardoqueo má me primu ndaja rē na Ester, hane sehe casua me me puestu xi camá tséhē nima Amán.

Ndatjin vē peru acta xi cavaxë Amán ne, ha quiji yejē nandya hane tijima tiña nixtin xi tsiquehen xuta xuta tjē rē Israel. Véhē xi quiji nga Ester tingotjo cuartu rcun, hane ngu ndiya nga ne, catsixinga me quicha rē ngahñucjua rē me, hane casacu cahndē xi cavisehen na. Cafehya na cjuandaja xi tsicjëya me cjua rē acta vē ta sa tsajin ne, cueya xuta rē na. Peru cachja me xi matitjun xi acta vē

ne, casane rë sellu rë xtungun rë me, hane ngatsë rë vë ne, cumajin cuindeya me cjua rë. Peru cachja me xi cuma ngu acta xi majo xi cuichja favor rë xuta tjë rë Israel. Cachja me cojo Ester cojo Mardoqueo xi cuaxë me ngu hacutjin chuya rë me, hane tine rë sellu rë me. Cuatjin casahmi me ne, cavaxë me ngu acta xi chja xi xuta tjë rë Israel ne, tjin rë me chuva rë xi cuaxëtje me yojo rë me, hane tsiquehen me xuta xi meje tsiquehen rë me nixtin hya. Catsihindu me acta vëhë cojo yëjë ni hne xi chja xuta xi siu me nangui xi vitexa Asuero, hane catsingatju me xujun vë yëjë ni nangui vë.

Hya xi cafehe nixtin jan ne, jercu cjín xuta condra rë me camá catsiquehen xuta tjë rë Israel. Hacuaha cojo quihndi rë Amán, catsiquehen me catsi të quihndi jan. Ngajan nandya Susa ne, casacu rë me cahndë, hane hacuaha catsiquehen me xuta hisca xi camanchujun. Hane xi camá ngui, sehe casahmi me ngu suhi jyë. Hya xi camá ne, catsingatju Mardoqueo cjua xi cafahatsja yëjë xuta tjë rë Israel xi sahmi me suhi vëhë chuva nu chuva nu cojo sa xi vitsjen rë me hacutjin cavatjuhnga me tsëhë xuta condra rë me. Xuta nandya jan ne, casahmi me suhi sa tejo hane nixtin tyjuhun ta jo nixtin cacaa rë cjuandya xi cuma rë xuta nandya, peru xuta ranchu

ne, casahmi me suhi vē nixtin teñuju ta ngu nixtin ni cacaā rē cjuandya tsēhē me. Suhi vēhē ne, Purim hmí rē.

Hya xi camá ne, Mardoqueo jercu casacu rē me ngahñu cjua ta jemu venguichji rē xa rē me ngajan nangui Persia. Suva me xi matitjun xi hitsē sa venguichji rē xi cuma rē me. Jercu ndaja cachja xuta tjē rē Israel tsēhē Mardoqueo ta cavisecoo me me, hane cachja me ngatsē rē xuta rē me.

### **Cavuya nahmi xi hmí rē Esdras nandya Jerusalén**

(**Esdras 7-10**)

Hya xi ha tjin rē yachan nu xi cajnetaha catsindaja xuta tjē rē Israel yungun ngajan Jerusalén, cafehe tjengui rē me ngu nahmi xi hmí rē Esdras xi caviyuju nandya Babilonia, nandya hñu rē xuta Caldeo. Esdras vē ne, jercu ndaja cavutaya me yéjé ley rē Nina. Cavihndē suva me ley jan hacuaha cavicuya me xuta rē me ley jan ngajan nangui rē xuta Caldeo. Hya xi tivéhëchini me yojo rē me xi cjue me Jerusalén ne, casacu rē me ngu xujun tsēhē me xi matitjun

rë nangui Caldeo xi casua cahndë xi tu yo ni xuta tjë rë Israel xi meje rë me ne, cuma cjue cojo me Esdras xi cuiyuju me nangui Israel. Ngajan xi jemu cjín xuta ngarca cojo nahmi cojo xuta tjë rë Levi cachuya rë me vëhë hane quiji me hya xi quiji Esdras. Hacuin suva casua me xi matitjun cahndë ta hacuaha casua me tujún xi cuatsë me chu xi cuma cjuatjo rë Nina hya xi cjuehe me. Hacuaha cachja me xi sua me mé sa xi cumameje rë me. Hacuaha catsingatju me cjua xi cafahatsja xutaxa rë xi tacunxa ngajan nangui Judá xi cachja xi cuatjuhnga nahmi vë cojo xuta levita tsëhë tujúsa. Hacuaha cachja me xi sua me Esdras sa tujún sa comida xi cumameje rë tsëhë xa rë yungun. Hya xi cjuehe Esdras ngajan ne, cuaxijin me yo xi cuma juez ngajan, hacuaha sahmi cuenda me xi sahmi xuta tu chichihin hacutjin chja ley rë Nina.

Ndiya xi cjue me nangui Judá ne, tsavi tjin, hane jemu jyë cjuanchina cjue me cojo. Vëhë xi xuta xi cjue me ne, caviyuju me xun rë Nina hane jercu casahmi me oración rë me cojo sa xi ndaja cjuehe me. Cumá cuehya me sindadu rë me xi matitjun xi cjue me cojo peru sava rë Esdras xi cuatjin sahmi me ta ha cachja me cojo me xi matitjun xi Nina ne, hatuxa cuisecoo me xuta xi faharcun rë

me. Hane sa xi cuehya me sindadu xi cjue me cojo ne, tsejen sacuaha xi quixiin cjua xi cachja me. Hya xi camá ne, Nina cahndë me cjua rë me, hane cafehe ndaja me nandya Jerusalén cojo yëjë tyucu oro hacuaha cojo yëjë tujún xi quiyi cojo me xi cumá tsëhë yungun.

Hya xi cafehe me nandya Jerusalén, catsiquehen me chu sacuaha mameje rë. Hya xi tijima xcusun rë yungun ne, camachaya rë me xi casecjan tjë rë xuta tjë rë Israel cojo xutaxin xi siu me ngajan ta yahnga me ne, cafaha me chjuun rë xutaxin, o sa xuta xi faharcun me nina ndyojo. Hisca cojo nahmi cojo xuta levita ne, tjin yo xi cafaha me chjuun tsëhë xutaxin jan. Hya xi camá ne, jemu choho camá rë Esdras, hane cuitjin cachja me cojo Nina:

—Nai, nixtin hatsëë ne, xutachanga niji ne, cahndiin me cjua tsujun hane canihñu me castigu. Yahnga me cahme me hya xi cafehe xuta condra niji, hane yahnga me quijicojo xuta vë ngu nanguicjin. Quihndë ne, jemu ndaja tivatju niji ta cavuyin canindijin yungun nuju, hane hisca me xi matitjun tsëhë nangui Persia ne,

ndaja vëë me yin. Peru suvin cavuyin canihñi cjuachoho xi casahmi xutachanga niji. —Cuatjin cachja Esdras xcun oración rë me.

Jinguyejë rë xi tivijacun me jyê rë xuta cojo Nina ne, tiviyujundee rë me xuta, hane cachja xuta xi tsingatjuxin me sa chjuun rë me o sa quihndi rë chjuun jan xi cuya me ndava nahmi rë me sa xi xuta xin má me. Hya xi camá ne, casahmi me sacuaha cachja me ta catsismi me chjuun rë me xi xutaxin má me, hane cavuya me nangui rë me ndava nahmi rë me. Hacuaha cojo quihndi xi catsin cojo me vë ne, quiji me cojo. Casahmi me cuatjin cojo sa xi ngu ni tjë cuma me ta cachja cjua rë Nina xi cumajin cuixan me cojo xutaxin.

**Nehemías ne, cavinchahaxi me xuta tjë rë Israel xi  
cuexo nga me xondyojo rë nandya Jerusalén**

(Nehemías 1-7)

Nehemías ne, xuta tjë rë Israel má me, hane cafaha me xa xi vincha me xan rë uva xi cuihi Artajerjes, me xi matitjun rë xuta Persia. Vëhë xi casahmi me xa ndihya rcun xi tacun nandya Susa.

Tjin xuta rē me xi ha cavuya me nangui Judá. Ngu nixtin cafehe Hanani cha hntsë me cojo xuta xicjin hntsë me tséhë nangui Judá. Hane Nehemías ne, cavinenguise me me hacutjin tivatju xuta ngajan. Hya xi camá ne, cachja me xi jemu tjin cjuacjintacun cojo xuta condra rē me. Cachja me xi jemu tsavi ta xondyojo rē nandya Jerusalén ne, cavetsun hya xi cavisehen sindadu rē Nabucodonosor me xi camatitjun rē xuta Caldeo nixtin hatsëë, hane tsajin yo xi sua ngahñu xi cuexo ndaja nga. Hya xi camachaya rē Nehemías cjuacjintacun vë ne, jemu choho camá rē me, hane cachja me oración rē me cuitjin:

—Nai, jemu jyë jemu hnngayun. Compromisu xi nihñu cojo xuta xi tsihmucacun me yun xi cuihndë me cjua nuju ne, nihñuchuhun yëjë ni. Sacuaha ngayin xuta tjë rē Israel ne, canuhyiin cjua rē ley nuju, hane ngatsë rē vëhë ne, camá niji castigu xi xuta condra niji ne, quiji me cojo niji nanguicjin rē me. Peru cojo compromisu xi canihñu cojo niji ne, canújun xi sa xi cuya cuinuhinyin cjua nuju ne, tuhun cahndë xi cuyin nangui niji. Vëhë xi tiféhya nuju xi chuya rē me xi matitjun cjua naha hya xi cuéhya rē me cahndë xi cuyá nangui Judá. —Cuatjin casahmi me oración rē me.

Hya xi cavatju ngu jo jyan sa ne, tivincha me xan rë uva xi cuihi me xi matitjun. Hane me xi matitjun jan ne, cavinenguise rë me mé ma rë me ta tsejen sacuaha xi va ma me. Catsacun me camá xi cuichja me mé ngatsë rë xi cuitjin va rë me, peru sehe cachja me cuitjin:

—Quixi nújun xi va má ná ta jemu hai tjin yojo naha ta nangui rë xutachanga naha ne, jemu vetsun. Sa xi ndaja casahme xa nuju ne, tuhun ná cahndë xi cjuê cuéxonada nga nandya Jerusalén.

—Cuatjin cachja Nehemías cojo me xi matitjun.

Hya xi camá ne, casua me xi matitjun cahndë xi quiji Nehemías hacuaha casua me xa xi cuma me gobernador tséhë nangui Judá. Hacuaha casua me me ngu xujun xi cjuahatsja xutaxa rë xi cuitexa me nangui xi siu tahndee rë nangui Israel cojo sa xi sahmi me nguyjë xi cuisecoo me Nehemías. Cuatjin camá hane tsejen xi cavisecoo Nina me sacuaha cafehya me ngajñi rë oración rë me.

Hya xi quiji Nehemías nangui Judá ne, ha tjin rë sacuaha tejyan nu xi quiji Esdras ngajan. Hya xi cafehe me Jerusalén, hya xi ha tjin rë jyan nixtin xi cafehe me, casahmitangun me ngujo xuta xihin,

hane sehe cojo me cavatju me ngu nixten xi scutsejenhma me xondyojo rë nandya Jerusalén. Meje scutsejen me jani tséhë xi cavetsun hya xi chaja sa cuichja me cojo xuta xi meje tsindaja me xondyojo jan. Hya xi cafahacuenda me tséhë xa xi meje rë xi cuma ne, sehe cachja me cjuatacun rë me cojo xuta xi cuisec oo me. Hacuaha cachja me mé cjuandaja sahmi me xi matitjun cojo sa xi cuma xa vë. Hane cachuya rë xuta cjua rë me hane camatangun cjuatacun rë me xi sahmi me. Hane cavetsihin me cavexo me xondyojo hacuaha cavetsihin catsindaja me tingotjo rë.

Hya xi tijima xa ne, jyan xuta venguichji rë xi xuta condra rë xuta tjë rë Israel ne, cavetsihin catsixcuehyu me xa rë me hacuaha cachja me xi xa xi tijima ne, sahmi me condra rë me xi matitjun rë Persia. Jyan me vëhë ne, me vihi má me: Sanbalat cojo Tobías cojo Gesem. Hya xi camá ne, sehe cafayangui Nehemías xi caveni cuichja xuta vë ta cuisec oo Nina xuta tjë rë Israel hane sacuaha xuta condra jan ne, ¿mé tséhë me xi cumandaja nga nandya Jerusalén?, ta tsajin rë me cahndë xi cumá rë nandya vë ta hacjahi tjë má me.


Hya xi camá ne, quijinduju xa. Jimangu ndava xuta ne, cafaha me ngu cahndë tséhë xondyojo xi satë rë me xi tsindaja me. Hane sa xondyojo o sa tingotjo ne, tijima xa rë. Sanbalat catsixcuehyu me cachja me xi caveni sahmi me ta jercu cavetsun hane tsajin ngu nixtin xi cuijnetaha xa. Hane Tobías cachja me xi xa xi sahmi me ne, hacuiin ndaja ta sa xi cuijinsun ngu chu ninda xcun ne, ngutjen cuixunjne. Ngajan xi Nehemías ne, cafehya me Nina xi cuisecoo me xcun xuta condra rë me, hane cjua xi choho chja xuta condra jan ne, cuma tséhë suva me cahndë xi cuma tséhë xuta tjë rë Israel.

Hya xi cavechu vasentjin chuva rë xi mameje rë xondyojo vë ne, camacjan rë xuta condra rë me, hane cavejñacacun me xi ticaain rë xi cjua rë me, hane meje rë xi tjin mé xi sahmi me cojo sa xi hacuiin hnga sa cuma xondyojo jan. Hane catsingatahacacun me xi sahmi me si cojo xuta nandya Jerusalén. Hya xi camá ne, camachaya rë xuta nandya Jerusalén cjuatacun vë, hane cafehya me Nina xi cuisecoo me me. Hacuaha tu jarë cahndë xondyojo hisca xi cjëë cuma ndaja ne, ngajan cavejña me xuta xi yaha me quicha espada rë me. Sehe Nehemías casua me ngahñu xuta ta cachja me xi miji rë xi cuma va rë me ta Nina cuisecoo me me, hane scaa rë me tsinguijne



me xuta vë. Peru hya xi camachaya rë Sanbalat cojo Tobías xi cavéhchjine xuta tjë rë Israel yojo rë me xi sahmi me si ne, catsindeya me cjuatacun rë me. Cuitjin quijinduju xa. Vasentjin rë xuta ne, casahmi me xa, hane vasentjin rë me siu me tivutsejen me sa xi cuinduva condra rë me, peru sa sahmi me xa o sa tivutsejen me ne, yaha me quicha espada rë me. Hacuaha catsuyiyhiya ngu cha chjinetyjo cojo sa xi sa xi tsejen xuta condra jan ne, tsijane me tyjo rë me, hane ngutjen cumatangun yëjë xuta cojo quicha rë me. Nixtin hya ne, yëjë xuta xi tisahmi me xa ne, quiijiin me ndava me hya xi ma nguixun ta cafañafë me cahntsua xondyojo jan. Hya xi jiñafë me ne, tacuntsja me quicha rë me hacuaha yaja me tsjian rë me cojo sa xi tjin chjine me sa xi cjuehe condra rë me.

Jinguyëjë rë xi tijima xondyojo ne, cavatju ngu cjuacjintacun ngajñi rë xuta tjë rë Israel. Yahnga xuta ne, tsajin rë me trigu xi cuma niñu rë me o tsajin rë me tujún xi cuechjitje me, hane xuta xi tjin rë me ne, tisua me, peru tifaha me quihndi rë xuta yuma jan o sa nangui rë me sacuaha chji rë. Hya xi camachaya rë Nehemías xi tijima vëhë ne, cachjataha me xuta xi cuatjin casahmi me ta xcusun vë ne, condra rë ley rë Nina má. Hane casahmi me ngujyë xi tsicuya xuta quihndi rë me o nangui rë me. Hane sacuaha suva me ne, handasa xi gobernador má me ne, cavaxë suva me tujúnsa xi satë rë me ta mijí rë me xi hnga sa cuechjitje xuta sa xi cojo me cuechjitjen me tujúnsa xi satë rë me xi matitjun.



Hya xi camá ne, cajnetaha xa rë xondyojo jan ne, hane suva meje sa xi cuejña me tingotjo cahndë xi mameje rë. Hya ne, casahmi ngahñu Sanbalat cojo Tobias cojo Gesem xi cuindacha me Nehemías. Cachja me xi meje rë xi cjue tjengui Nehemías me. Quixiin xi meje cuichja me cojo Nehemías ta xi meje rë me ne, xi cjuexin me tséhë nandya hane ngajan sahmi me dañu me. Peru casahmii Nehemías sacuaha xi meje rë me hane catsingatju me cjua xi mahyiin rë me nduva me ta xa xi tijima ne, jercu venguichji rë.

Jyan ndiya sa catsingatju condra rë me cjua hane jyan ndiya sa ha tu cuanitjin catsicuya me cjua. Sehe ngu ndiya nga catsingatju me me cjua xi cjue tjengui me me ta cachja me xi chja cjua ta tisahmi Nehemías condra rë me xi matitjun rë Persia, hane meje rë Nehemías xi cuma me me xi matitjun rë nangui Judá. Cachja Nehemías xi tu tichja ni me hane tsajin yo xi tichja cuatjin. Ndaja vëë me xi xi meje rë condra me ne, meje rë me xi tsajin ngu xondyojo hñu nandya Jerusalén, hane cahndë xi casejyu xa ne, hitsë sa casahmi me ngahñu xi xati cuijnetaha.

Ngu nixtin ne, quiiji Nehemías ndava ngu xuta rë me xi hmí rë Semaías. Cha Semaías ne, jiyahñu cha ndava cha. Hane cachja cha cojo me xi meje rë xi cjue cuinchahma me cahntsua yungun ta cuinduva xu condra rë me hya xi cuma nguixun hane tsiquehen me me. Ngajan cachja Nehemías xi handasa nduva condra rë me Peru cumajin cuisehen me cahntsua yungun ta hacuiin nahmi má me. Hya xi camá ne, camachaya rë Nehemías xi cha Semaías vë cafaha cha tujún tséhë Tobiah cojo Sanbalat xi cuatjin cachja cha cojo Nehemías ta meje rë me xi sahmi Nehemías ngu jyê xcun Nina cojo sa xi choho cuichja me tséhë me.

Hya xi camá ne, quijinduju xa, hane hya xi camá yachan tejo nixtin xi tijima ne, cajnetaha camahnga xondyojo vë hacuaha cajnetaha cavetaha me tingotjo rë. Hya xi cavutsejen xuta condra rë me hacutjin camá xa vë, quijircun rë me. Cafaha rë me hindta camachaya rë me xi Nina cavisecoo me xuta tjë rë Israel xi cama casahmi me xa vë.

Sehe casuaxa Nehemías ngujo xuta xihin xi cjue cjuahacuenda me tingotjo xondyojo. Cavitexa me me xi sechja tingotjo nguixun ta

hya xi cjuahajenda xuta, hane hacuiin quicun me. Jemu jyë nangui xi cuiyujundee rë xondyojo jan peru hacuiin cjín má ndava xuta xi hincha rë. Vëhë xi cachjahaxi Nehemías cojo xuta xi tjin yo me xi cjue sahmi me ndava me nandya jan.

**Cavicuya Esdras cojo Nehemías xuta cojo sa xi  
quihndë sahmii me xcusun xi ndajin, hane cuihndë me  
ley rë cjua rë Nina**

(Nehemías 8-13)

Hya xi cajnetaha xondyojo jan ne, sehe cafehe sa xi mayatu tséhë nu vë. Hane sa vë camatangun xuta tjë rë Israel ngajan nandya Jerusalén cojo sa xi cumá suhi xi hmí rë Ndihya xca o Ndihya tsjian. Hane hya xi camatangun me ne, cavaxë nahmi Esdras xtë rë xujun rë Nina, hane camiji me hiscan casahmi me ngu cahndê hnга cojo sa xi ndaja cuinuhya rë sehe ngajan cachjasun me ley rë Nina cojo sa xi cuihndë yëjë xuta cjua vë. Hacuiin suva cachja me cjua rë ley jan, peru hacuaha cachja me mé vijne jima ngu ley hane mameje rë xi sahmi xuta. Hane xuta levita ne, cavisecoo me xi cachjandaja me

cjua jan. Hane xi cahndē xuta cjua jan ne, choho má rē me ta tsejen xi cahndiin me cjua jan. Peru cachja Esdras cojo Nehemías cojo xuta levita ta ndicumaha ni ne, hacuiin choho cumá rē me ta meje rē xi ndama rē me ngatsē rē suhi, ta suhi jan ne, tséhë Nina má. Hya xi camá ne, quiji xuta cavatē me tsja rē ya cojo sa xi cuma ndava me sacuaha ngu ndihya nguijña. Sehe cuiyuju me cahntsua ndihya vē ngu totje sacuaha meje rē tséhë suhi vē. Casahmi me suhi tu cun xi cavitexa Nina xi cumá. Hitsē sa ndaja chihin casahmi me suhi xi cuma rē xutachanga rē me. Ha tjin rē sacuaha mil nu xi cuatjin ndaja cavatju suhi vē ta camá hya xi sehe cavisehen me nangui Canaán cojo Josué.

Hane xi cajnetaha suhi vē, sehe cafehe nixtin can ñuju tséhë sa vē, hane hya camatangun xuta cojo sa xi cuijacun me jyê rē me xcun Nina. Sacuaha vasen nchisen ne, cahndē me xi cavutaya xuta cjua rē Nina. Sehe vasen nchisen nga ne, cavijacun me jyê rē me, hane hacuaha casahmi jyê casahmi hnga me Nina. Hacuaha cavitsjen rē me yéjé cjuandaja xi casahmi Nina cojo xutachanga rē me. Cavetsihin cachja me tséhë nixtin rē nima Abraham hiscan nixtin xi quiji xuta condra rē me cojo xuta tjé rē Israel. Sehe cafehya nga me

cjuandaja rë Nina ta handasa cafehe nga me nangui xi casua Nina xutachanga rë me ne, choho ma rë me ta tacun me ngahma rë gubiernu rë me xi matitjun rë Persia.

Sehe cachja me xi sahmi nga me ngu compromisu cojo Nina. Cuitjin cachja me. Cachja me xi cuixaain me cojo xutaxin hacuaha quihndë cjuahacuenda me nixtin xi chjahajenda rë, hane sahmii me ndetsin cojo xutaxin xi nduva sahmi me negocio sa nixtin vë o sa yahnga nixtin rë suhi xi chjahajenda rë. Hacuaha cachja me xi cjuaharcun me nu xi chjahajenda rë nangui, hane cuinchaain me tjë nixtin hya. Hacuaha tsismi me xuta tjë rë Israel xi cafaha me sacuaha mosu hndixahan rë me. Hane hacuaha cuechji me yëjë tujúnsan xi cumá tsëhë yungun cojo sa xi yungun rë Nina ne, ndaja cuetju.

Xuta xi tjun me ne, caviyuju me nandya Jerusalén. Peru cojo sa xi cjín cuma xuta nandya vë ne, cavaxë me ngu suerte cojo sa xi chuva rë të ndava xuta xi yahnga ne, cjue ngu ndava me xi cuiyujun me ngajan. Hane cuatjin casahmi me.

Hya xi cavatju tejo nu ne, cavuya Nehemías nangui Persia hisca casahmi me xa; qui ji cavutsejen me Artajerjes me xi matitjun. Hane ngu nahmi xi hmí rë Eliasib cafaha me xa xi cjuahacuenda me cuartu rë yungun hisca cuiyujundaja xcusun xi cumameje rë. Hane hya xi tsajin xti Nehemías ne, casua Eliasib cahndë xi Tobías vë catsicojoxa me ngu cuartu ngajan ta vinga rë me cha Tobías. Casahmi me cuatjin handasa xi Tobías vë ne, má cha xuta amonita hacuaha má cha xuta condra rë xuta tjë rë Israel. Sehe cavuya Nehemías, hane jercu camacjan rë me ta chja cjua rë Nina xi cumajin cuisehen ngu xuta amonita cahntsua yungun. Hane cavaxë me cha cojo yëjë xi tséhë cha, hane sehe casahmi me xi catsityahi nga nahmi cuartu vë sacuaha chja cjua rë Nina.

Ngu nga xcusun xi camá hya xi tsajin xti me ne, tjin yahnga xuta levita xi casacuiin rë me chji rë me, hane cavuya casahmi me xa nguijña. Ngajan xi catsingatju Nehemías xuta xi cjue jaha me xuta vë, hane cachja me yo xi satë rë xi cuatëcja rë cjuatjo rë xuta cojo sa xi jimangu xuta levita ne, sacu rë me hacutjin satë rë me. Hacuaha camachaya rë me xi tjin xuta tjë rë Israel xi sahmi me xa nixtin xi chjahajenda rë hane yahnga me ne, cafehe me cojo comida

xi caviteña me nixtin hya. Ngajan xi cavitexa me xi sechja tingotjo xondyojo nixtin vë, hane hisca nchujun ni sehe tuxahan. Hya xi camá ne, hya xi cafehe xutaxin nandya Jerusalén nixtin xi chjahajenda rë, cavyuju me ndatsen nandya hiscan xi camanchujun. Peru cachuyiin rë Nehemías, hane cachjataha me me. Sehe cafiin me nixtin vë ta cafehe me nixtin ndaja. Hacuaha casahmi me castigu xuta xi cama cjuavixan rë cojo xutaxin, hisca cachja me xi quihndë sahmii me cuatjin. Hacuaha cafahaxin me xa rë ngu nahmi xi cavixan me cojo na quihndi rë Sanbalat, xutaxin xi condra rë me má.

### **Cachja profeta Malaquías cjua rë Nina cojo xuta tjë rë Israel**

**(Malaquías 1-4)**

Hya xi cavatju nu xi quiyi Nehemías nandya Jerusalén, hane cavitexa me xuta hya xi catsindaja me xondyojo rë nandya ne, sehe catsingatju Nina profeta Malaquías, hane cachja me cojo xuta tjë rë Israel. Cuitjin cachja me cojo nahmi:

—Ngayun xi má yun nahmi ne, maxta nuju tséhë Nina cahndë xi chjuhuncun me. Cahndë xi tuhun chu xi ndacun xi cuma cjuatjö rë Nina ne, chjuhun ngu chu rca o ngu chu rengun, hane chu vëhë ne, tuhun rë me chu. Hane xi má nuju ne, tsajin mé sahmi rë xi cuatjin nihñu. Hacuaha tjin xi cun rë vë xuta xi nduva me cojo chu vë. ¿Há tuhun chu vë xi cuechjun rë me xi matitjun tsujun? Tuun, ta chuyiin rë me. Peru tuhun rë Nina sacuaha xi tsajin mé sahmi rë. Xutaxin ne, hitsë sa ndaja chu sua me Nina rë me xi cuma rë chu xi tuhun rë Nina nuju.

—Meje rë xi ngu nahmi ne, chja me cjuaquixi. Meje rë xi ndaja cuicuya me xuta cojo sa xi cumatangun cjuatacun rë me cojo cjuatacun rë Nina. Peru ngayun nahmi ne, ngatsë rë cjuandesu nuju ne, hitsë sa chocun camá xcusun rë xuta. Compromisu xi casahmi Nina cojo xutachanga nuju ne, canihñuchuun, hane vëhë xi tsajin xuta ngarca xi faharcun nuju.

Sehe cachja Malaquías cojo xuta cuitjin:

—Hacuanitjin yëjë ngayun xuta tjë rë Israel ta nihñuchuun compromisu nuju sa xi cojo Nina o sa xi cojo xuta xingun. Tjin

ngayun xi cavixun cojo xutaxin, hane tjin ngayun xi nismu xingun. Nina ne, miji cuihndë sa me cjua ngarca nuju. Xuta tsehen ne, nújun xi ndaja me, hane ndaja scuëë Nina me. Nújun sacuaha xi meje nuju xi Nina ne, tu chichihin sahmi me justicia. Tichjáquixë cojo nuju ta cuechu nixtin xi tsingatju Nina ngu cha xi cjuaha cjua rë me, hane sacuaha matyjahi ndiya hya xi nduva ngu xuta rcun ne, sahmi tyjahi cha cjuatacun rë xuta ngatsë rë me xi cuinduva. Hane nguhñusasa cjuehe Nai xi tsingatju Nina yungun. Tsajin yo xi tjin rë ngu cjuatacun tyjahi xi cuma secun xcun me vë. Hane tsityjahi jain me yungun cojo yëjë xi tsëhë yungun. Hane hya xi cuijnetaha tsityjahi me yëjë ni ne, sehe cjuatjo xi sua nahmi ne, chuya rë Nina tsëhë. Quixi xi tu chichihin sahmi me justicia. Cuinchajyë me ngayun xi choho nihñu, ngayun xi nihñu cjuasurqui, ngayun xi cuinechun cojo chjuun xi hacuiin tsujun, ngayun xi nújun cjuandesu, cojo ngayun xi cuindachun rë xuta yuma o xutaxin. Ngayun xi cuatjin nihñu ne, tsejen xi chjuhunrcuun Nina.

’Tacun cuaha Nina xi sahmichihin me cjua rë me xi camá cojo xutachanga nuju ta xuta tjë rë Jacob má yun. Sa xi nihñu sacuaha satë nuju nihñu ne, sahmi me sacuaha cachja me. Ngu cahndë tsëhë

tē cahndē xi tsujun ne, nduvun cojo sacuaha cafehya me xcun compromisu. Hane sa xi nihñu ne, chutsujun xi ndaja cuma tsujun.

'Nújun xi caveni cuinuhyun cjua rē Nina ta tsejen xi xuta xi jemu choho sahmi me ne, jercu nchina má me. Hitsē sa nchina má me xi cuma rē xuta xi faharcun me Nina. Tsejen sacuaha tsajin mé sahmi Nina cojo me handasa cuihndiin me tséhē me. Cuatjin tsejen Peru ha meje cjuehe nixtin xi cuma castigu xuta vē, hane sacuaha fē xtē hya xi cueti ne, cuatjin cumá rē me. Hacuaha hya ne, ndaja cuatju rē xuta xi cahndē me cjua rē Nina. Vēhē xi chjuhuncuendun cjua rē ley rē Nina xi casua me Moisés ngajan naxi Sinai cojo sa xi cuinuhya rē xuta tjē rē Israel.

**Hacuaha cachja Malaquías cuitjin:**

—Hya xi chaja sa cjuehe nixtin hya ne, tsingatju Nina profeta Elías, hane sahmi me xi cuya cuma ndaja cacun nga yējē ni nahmi rē nixti cojo nixti rē me.

**Casua Nina cahndê xi cavatju cjuañihi  
ngu xuta ndaja**

(Job 1:1-2:10)


Ngu nixtin jemu hatsëë camahani ne, cavejñâ ngu xuta nchina xi hmí rë Job. Jemu ndaja xuta me. Cafaharcun me Nina hacuaha jemu ndaja casahmi me cojo xuta yuma.

Ngu nixtin hya ne, cafehe yëjë ni ángel hiscan cahndë rcu rë Nina, hane hacuaha hya ne, cafehe Satanás. Hya xi camá ne, caveyanangui Nina Job cojo Satanás, hane cachja me xi Job ne, hatuxa ndaja sahmi me ta hitsë sa ndaja sahmi me xi cuma rë yahnga xuta. Sehe cachja Satanás cuitjin:

—Hacuiin tu cjuandaja rë me xi ndaja sahmi me ta ngatsë rë vë xi jemu camá nchina me, hane tsajin mé cjuañihi xi satë rë me. Vëhë xi chuya rë me tsujun. Sa xi tsichaja me yëjë ni ne, choho cuichja me tsujun.

Hane cuitjin cafayangui Nina:

— ¿Há macjain nuju? Chutsejen sa xi quixi nújun. Tjin nuju cahndë xi chjuhunxun mé xi tsëhë me. Peru sacuaha yojo rë suva me ne, tsajin nuju cahndë xi nicujun.



Hya xi camá ne, Satanás ne, cavetsihin casua cha Job cjuañihi ta chuva ngu chuva ngu cavetsihin. Titjun ne xuta cafehe catsiquehen me chu ndyaja rë Job cojo xuta xi fahacuenda chu vë. Cojo chu tsanga rë me hacuaha cojo chu camellu rë me ne, choho cavatju chu vë. Sehen cjanengui rcu ndihya hiscan tijinë quihndi rë me, hane cahme quihndi jan. Cuatjin chuva ngu chuva ngu cha cafehe suacuenda cha me tsëhë cjuachoho vë. Jercu choho camá rë Job hane cuitjin cachja me:

—Hya xi catsin ngahan, tsajin mé xi tjin ná, hane hya xi cueya hacuanitjin cumá. Nina casua me tsahan, hane sehe cavaxë me mé xi casua me. Me vë xi jyë me; me vë xi hnga me.

Hya xi camá ne, tsajin jyë xi cuma rë Job nixtin hya ta cavinchaain me Nina jyë rë cjuañihi xi cavatju me.

Cavatju sa nixtin, hane cafehe nga ángel xcun Nina, hane hacuaha cafehe Satanás. Hya xi cama ne, cuitjin cachja Nina:

—Quihndë ne, ¿mé nújun tséhë Job? Casuá nuju cahndë xi meje nuju, peru hacuiin cuatjin camá sacuaha xi canújun ta cjuinduju sahmi me xi ndaja, hane catsindeyaain me cjuatacun rë me.

Sehe cachja Satanás cuitjin:

—Hacuiin jemu choho cavatju me ta ndajyihi cjuañu rë me. Sa xi jemu hmu rë me ne, hacjahi cumá.

Sehe cachja Nina cuitjin:

—Ha joho, cumá hmu rë me, peru nicuun me.

Hya xi camá ne, casahmi Satanás xi jingujyë yojo rë Job ne,  
jercu cafaha rë chíhin tsjë. Jercu hmu camahani. Hya xi camá ne,  
cachja chjuun rë me cuitjin:

—¿Há caa ri cojo vi? Hitsë sa ndaja sa xi choho cuinóje tséhë  
Nina hane ngutjen cueye.



**Peru cafayangui Job cuitjin:**

—Hacuiin cuatjin xi nóje. Hya xi sua naja Nina mé xi ndaja ne, ndama naja, hane ngutjen chjahanntsaan tsëhë me. Sa xi cuatjin xcusun naja ne, ndajintjin xi cuinújan xi miji naja yahnga xcusun xi sua mé yaan.

Cuatjin cachja Job, hane cafaharcu me Nina. Hane xi ma rë Nina ne, jercu ndaja cachja me.

**Cafehe jyan amigu ndaja rë Job,  
hane cavisiajmi me cojo me**

(Job 2:11-14:21)

Job ne, tjin rë me jyan amigu xi ndaja vinga rë me. Ngu cha Elifaz hmi rë cha, ngu cha Bildad hmi rë cha, hane cha xi majyan ne, Zofar hmi rë cha. Hya xi camachaya rë me mé xi cavatju Job ne, quiyi tjengui me catsijyan me Job xi sua me cjuetacun. Hya xi cavutsejen me hacutjin jyihi Job ne, jemu choho ma rë me, hane ngu

**totje tu jyuu ni caviyuju me cojo xicjin me cojo sa xi sua rë me ngahñu.** Hya xi cavatju ngu totje jan ne, sehe cachja Job cuitjin:

—Xi ma ná ne, hitsē sa ndaja sa xi cahme ngahan hora xi catsin ngahan o sa xi cjanénguëya hya xi chaja sa catsin ngahan cojo sa xi quihndë ne, tsajin mé cjuañihi xi tjin ná. ¿Me machji rëhë cjuahñu xi tjin ná vi sa xi meje cuéya?

Hya xi cajnetaha cachja Job cuatjin ne, sehe cachja Elifaz cuitjin:

—Ngayun, jemu ndaja canújun, hane catuhun ngahñu rë xuta hya xi tuhun cjuetacun tsëhë mé cjuañihi xi tivatju me. Quihndë xi ngayun casatë nuju ne, ¿má caain nuju? Nina ne, ndaja sahmi me cojo xuta ndaja, hane sahmi me castigu xuta tsehen. Sa xi quixi vëhë ne, tjin mé canichujun. Tinungusun rë Nina mé xi canihñu, hane chjahyun rë me cjuaninchataha. Xi cuatjin nihñu ne, Nina sahmi me xi ndaja cuma nga nuju.

Sehe cachja Job cuitjin:



—Jemu hmu ná. Ngayun sacuaha amigu naha ne, meje rë xi yuma má nuju ngahan, miji rë xi cuinchunjyun ná. Nújun xi casahme ngu jyê. Sa xi cuatjin ne, ¿mé casahme? Xi meje ná ne, meje cuéya. Sa xi sua Nina cahndë xi cuéya ne, ndatjin. Xi má nuju ne, ¿há ndaja xi sua Nina cjuahñu rë ngu xuta xi tsin me peru xcun cjuahñu vë ne, jemu cjin cjuañihi cuatju me? Sa xi tjin xi cun ná, ndatjin, peru ¿mé má xi sacuiin ná cjuaninchataha xi féhya?

**Sehe cachja cha Bildad cuitjin:**

Ngu xcusun xi hyan ta Nina ne, jemu quixi me hya xi tsichuva me xuta. Hane sa xi cuatjin ne, hya xi cuatjun xuta cjuañihi, cuatju me cjuañihi vë ta tjin xi cun rë me.

### **Ngajan cachja Job cuitjin:**

Tsajin mé xi casahme, peru caveni cuichjataha rë Nina ta jemu jyë me jemu hnga me. Xi cuichjá cojo me, tsicuyaain me cjua tsahan. Sahmi me mé xi sahmi me handasa cojo xuta ndaja o sa cojo xuta tsehen. Sa xi tjin rë me mé condra naha, meje ná xi cuichja me. Choho ma ná xi hviin mé má cuatjin tijima ná.

### **Sehe cachja Zofar cuitjin.**

—Jemu tinújun. Nújun xi tsajin mé xi canihñu. Peru sa xi cuichja Nina cojo nuju, xi cjuaquixi ne, jemu cjín jyê xi cuma cuichja me tsujun. Nina vëë me sa xi ndaja o sa xi ndajin sahmi ngu xuta. Tjin cjuaquixi xi canihñu ngu xcusun xi jemu chojyihu camahani. Chjahyun cjuaninchataha tsujun cojo sa xi cjuë cjuachan vë. Sehe ngajan cuijnetaha cjuañihu xi cuma nuju.

Hya xi camá ne, Job ne, miji cuihndë sa me cjua rë cha, hane cachja me cuitjin:

—Tinújun sacuaha xi suvun hyun yëjë cjuatacun vë. Peru ngahan, hacuaha ndaja hvë. Yëjë xuta ne, vejnucëë me tsahan, peru tsajin mé xi casahme cojo sa xi cuatjin cumá. Quixi xi nújun, peru hacuaha quixi xi tjin xuta tsehen xi ndaja vatju tsëhë me. Ngutjen cuinújun mé xi ndaja sahme ta hacuiin ngayun xi tijima nuju vi. Ndaja hvë xi Nina vitexa me yëjë ni. Hacuaha hvë yëjë cjuatacun xi canújun. Peru cjuatacun xi canújun ne, cavuya cjuandacha. Sa xi jercu ndaja cjuatacun nuju ne, canujuun. Nuhyun cjua naha. Ngayun ne, ¿há rcuun cuinújun ngatsë rë Nina? Sa xi hacuiin cuatjin xi tinújun ngatsë rë me ne, ¿há chuya rë me? Chuyaain rë me. Ngahan, ha tuxa meje cuichjá cojo me hane cuichja xi tsajin xi cun ná. Sa xi ma rë me xi tjin cun ná, jercu meje scuëë mé tjin xi cun ná, ta hveen. Tivátju cjuañihi hane hveen mé tsëhë hacuaha hveen mé sahme.

### **Cuya cuichjataha nga amigu rë Job me**

**(Job 15-21)**

Hya xi cajnetaha cachja Job, sehe cachja nga Elifaz cojo Job cuitjin:

—Chja xuta xi jemu ndaja cjuatacun nuju. Peru cjua xi canújun ne, nuhya rë sacuaha cjuangarca ta nuhya rë sacuaha xi chjuhunrcuun Nina sacuaha meje rë xi cjuaharcun xuta me. Hane xi ma ná ne, ngajan tsejen xi tjin xi cun nuju. Cjua vihi xi tichjá ne, hacuanitjin chja xuta xi jercu vechu cjuatacun rë me. Tsajin ngu xuta xi tyjahi cjuatacun rë me xcun Nina. Cuya cuichjá xi xuta tsehen ne, me vëhë xi cuatju me cjuañihi.

Sehe cafayanguí Job cuitjin:

—Sa xi casatë nuju cjuañihi vi hane tichjá cojo nuju cahndë xi tinújun cojo ná ne, cuma cuichjá sacuaha tinújun hacuaha hvë ndaja yëjë cjua xi cuma cuichjá cojo nuju. Peru xi ma ná ne, cuichjaantaha nuju cuatjin ta yuma cuma ná ngayun hane suá nuju cjuetacun. Peru ngayun ne, tinújun xi yuma má nuju ngahan hane sehe nûjuntuhun ná. Jemu tivátju cjuañihi hane xuta na ha ne, cuesuntaha me cjuañihi ta sahmi me xi jercu va má ná. Xuta ndaja ne, hndiin me mé má tivátju cjuañihi. ¿Há tsajin sa ngu cjuatacun xi hitsë sa venguichji rë? ¿Há tsajin yo xi tjin rë ngu cjuatacun xi cuma cuetahacácun?

**Sehe cavuya cachja Bildad cuitjin:**

—Hitsë sa ndaja sa xi ningatahatacunndujun, hane sehe cuinújun. Tivitsjen nuju ta xuta tsehen ne, me vëhë xi vatju me cjuañihi.

**Sehe cachja Job cuitjin:**

—Camá tē ndiya xi canújun, hane ngu ni cjua tinújun, ta tinújun xi tjin xi cun ná. Peru hacuiin cuatjin. Hveen mé má ni xi casua Nina cahndë xi tivátju cjuañihi. Sa mosu naha, sa xuta naha miji scuëë me ngahan. Tuhun ná hitsë cjuayumatacun hane jyuu ni nechun. Tjin ná cjuaquixi xi Nina ne, quicun me. Hane cuechu nixtin xi scuëë me.

**Sehe cuitjin cachja Zofar:**

—Ma xti ná xi cuatjin tinújun, hane sahmi nguyjë xi cuichjá. Quixi xi jiya hora ne, ndaja cuatju xuta tsehen peru cuechu nixtin xi satë rë me castigu.

### **Ngajan cafayangui Job cuitjin:**

—Ndastu nihñu favor xi nuhyun cjua naha. Tjin xuta tsehen xi ndaja cuatju me hisca nixtin xi tsin me hisca hya xi cueya me. Xuta vë ne, sahmi cuendaain me cjuatacun rë Nina. Peru handasa cuatjin ne, nchina me, changa me hya xi cueya me, hane tsajin me cjuacjintacun hya xi cueya me. Cumá cuinújun xi ndastu quihndi rë me cumá me cjuañihi, peru machjiriin cjuatacun vë, ta hya xi cahme xuta tsehen jan ne, sahmi cuendaain me tsëhë ndava me ta nima me. Canújun, peru tsajin cjuaquixi ta hacuiin cuatjin tsejen ngasunhndë hane tsajin ná cjuetacun cojo.

### **Cuya cuichja nga amigu rë Job**

**(Job 22-31)**

Hya xi camá ne, cachja Elifaz cojo Job xi camá jyan ndiya.

Cuitjin cachja me:

—Sa xi tyjahi cjuatacun nuju ne, casuaain Nina cahndë xi cuma nuju cjuañihi. Jemu nchina ngayun, hane tjin cjuandaja xi cuma

nihñu xi canihñuu. Tichjá cojo nuju xi cuangunxun tsëhë cjuatsehen hane nuhyun tsëhë Nina, ta sa xi cuatjin nihñu ne, sahmi Nina xi ndaja cuma nga nuju.

**Sehe cachja Job cuitjin:**

—Sa xi cuma cuisiajme cojo Nina xcun cojo xcun hane cuichja me mé tsëhë xi cuatjin tijima ne, cumanga ná. Peru cumajin, jemu jyë hnga me hane sahmi me hacutjin chuya rë me. Hane xuta xi sahmi me cjuatsehen cjuenduju me cojo ngasunhndë rë me.

**Sehe cachja Bildad cuitjin:**

—Nina ne, jemu jyë hnga me. Sacuaha sa cojo niñú ne, tsajin mé machji rë xi cuma rë Nina. Sa xi cuatjin ne, ¿há tjin xi ngu xuta ne, cumachji rë me xcun Nina?

**Ngajan xi cafayangui Job cuitjin:**

—Cjua xi canújun ne, tsajin cjuetacun xi cumá ná. Hacuaha cuma cuichjá xi jyë hnga Nina hane tsajin yo cuechutaha cjuatacun

rë me. Peru xi má ná ne, xcusun xi casahmi me cojo ná ne, cuenda casahmi me. Cuma cuichjá xi tjin ná xi cun ná hane cumangutacun, peru quixiin, hane cuichjaan. Tsajin ná xi cun ná hane cuichja cjuaquixi vë hisca hya xi cuéya. Quixi nújun xi xuta tsehen cuatju me cjuañihi. Peru hacuiin ngatsë rë vë xi tivátju ngahan cjuañihi.

'Ngu xuta ne, hitsë sa tjin rë cjuatacun xi cuma rë ngu chu ta cuma sacu rë me oro, o quicha tyava, o tu seti ngajan hisca ngahma rë ngasunhndë. Peru ngu cjuatacun xi jemu venguichji rë ne, tsajin ngu xuta xi hvë me jani sacu vë. Hacuaha cumajin chahan cojo cjuanchina naja. Suva Nina xi tjin rë me yëjë ni cjuatacun. Hane cuitjin chja Nina cojo xuta ngasunhndë: "Chjuhunrcun Nina ta sa xi nihñu ne, tjin nuju cjuatacun. Hane tangunxun tsëhë yëjë cjuatsehen ta sa xi cuangunxun ne, cavijnercun.

'Meje ná xi cuma cuya sacuaha xi camá nixtin hatsëë hya xi cëjëndaja cojo ngasunhndë naha. Hya ne, ndaja cavëë ná xuta. Hacuaha hya ne, cavisécoo rë xuta yuma. Peru quihndë ne, vejnucëë yëjë xuta ngahan. Hisca vejnucëë xuta tsehen. Vëhë xi jemu va ná. Xi má ná ne, catsitjungui Nina ngahan. Casahmi me xi

tivátju cjuañihi hane hya xi cuichjá cojo me ne, chjaain me. Xuta yuma xi cafehya ná me cjuandaja ne, casuá. Tsajin yo xi cavindáchare. Tsajin ngu nixtin xi meje ná ngu chjuun xi hacuiin tsahan. Vëë Nina xi tsajin ná xi cun ná. Sa xi quixiin ne, catisahmi me castigu. Peru faharcun Nina, hane miji ná castigu rë me, hane casahmee cuatjin. Camacjaiin ná xi ndatjin cuátju ta tjin ná tujún. Cafaharcuun Nina ndacha sa sa o sa tsuhi o sa hacjahi xcusun. Tsajin ná cjuasua hya xi choho camá tséhë xuta condra naha. Suva meje squëë mé tséhë xi tivátju cjuañihi vi ta tivátju peru hacuiin ngatsë rë ngu xcusun chojyihí vë xi casahme, ta casahmee. Vëhë xi cuichjá cojo nuju.

Hya xi camá ne, quihndë cachjaain sa jyan cha vë ta camachaya rë cha xi xi má rë Job, tsajin xi cun rë me.

### **Ngu amigu xi mañuju ne, chjataha cha Job**

(Job 32-37)

Hya xi camá ne, cavetsihin cachja ngu cha xi hacjahi. Cha vë ne, Eliú hmi rë. Cjëë cuichja cha ta chihndë cha xi cuma rë jyan cha

xi ha cachja jan. Véhë xi catsingatahacacun cha xi tjun cuichja jyan cha vë hane sehe cuichja suva cha. Jercu xti rë cha xi má rë Job xi tjin rë me chuva rë cahndë xi tjin rë Nina chuva rë. Hacuaha xti rë me ta jyan amigu jan ne, hacuiin ndaja catsicuya me cjua rë. Sehe cachja Eliú cuitjin:

—Tsajin mé cachjá hiscan quihndë ta ngayun ne, hitsë sa changá yun xi cumá ngahan. Peru hacuiin suva xuta changá xi tjin rë me cjuatacun. Hane quihndë hacuaha cuichjá cojo nuju. Cahndë cjua xi canújun peru handasa canújun catsijyan ngayun ne, tsajin ngu cjuatacun xi ndaja xi canújun cojo Job. Sacuaha cjua xi cachja Job ne, meje cuichjá cjua vi: Nina ne, jemu jyë hnga camahani me, hane machjiriin xi nûjuntuhun rë me. Cjuatacun rë Nina ne, hacuiin ngu ni cahndë xi sacu. Jiya hora ne, sahmi me xi tsacjun xuta me ta meje rë me xi cuihndë xuta tsëhë me. Cachja Job xi tsajin mé xi sacu rë ngu xuta ngatsë rë xi faharcun me Nina, peru chjá ngahan xi sua Nina xuta chichihin ni sacuaha satë rë jimangu me. ¿Há má nuju xi suaain Nina sacuaha satë rë xuta? Ndajintjin xi cjuenduju cuinujuntuhun rë Nina ngatsë rë xcusun xi sahmi me. Xuta xta ne, jindaya me Nina hya xi hmu rë me. Ngayun Job, nihñu sacuaha

xuta yuma xcun Nina. Chjuhun cjuetacun xi hacuiin hitsë sa jyë cjuanõhi camá nuju ngatsë rë cjuangarca nuju. Xi ma ná ne, cjuá vi xi quixi. Sahmi Nina castigu xuta xi choho sahmi me cojo sa xi cuya sahmi me cjuandaja hane cuihndë me tsëhë me. Vëhë xi cjuaquixi, peru Nina ne, jemu jyë hnga me hane tsajin yo ngayaan xi cuechutaha cjuatacun rë me.

## **Cachja Nina cojo Job**

**(Job 38-40)**

Hya xi camá ne, jemu choho camá nixtin; cafehe yufi, cavanga tjo. Hane hya ne, cachja Nina cojo Job cuitjin:

—Cha vi ne, cha ngarca má cha, hane quixiin xi chja cha ngatsë na. Peru hacuaha ngaye, Job, hacuaha cachaja cjuatacun riji ta hacuiin quixi yëjë xi canóje. Tsajin ri cjuahñu hya xi casahme ngasunhndë. Jemu tjin cjuatacun xi hyiin sa xi tsëhë ngasunhndë vi, o sa xi tsëhë ndachacun, sa xi tsëhë niñú, o sa xi tsëhë chu xi casahme. Tsajin ri cjuatacun sacuaha tjin ná hacuaha tsajin ri

**ngahñu sacuaha ngahñu naha.** Vēhē xi cuidadu xi cuinoje hacutjin meje rē xi sahme.

**Sehe cachja Job cuitjin:**

—Quixi nújun. Ngahan ne, xuta yuma ngahan, hane tsajin mé xi cuichjá cojo nuju.

**Sehe cavuya cachja Nina cuitjin:**

—Ngahan ne, jemu quixi cojo cjua naha, jemu quixi cojo cjuatacun naha. Yējē xcusun ngasunhndē ne, tacunntsá ná, hane cuitéxa, hane sahme vē cojo cjuaquixi cojo cjuatacun.

**Sehe cachja Job cuitjin:**

—Tjin nuju chuva rē. Quihndē tsejen xi cuma nihñu tu mé ni xcusun, hane cjuatacun nuju ne, hatuxa cuma chihin. Hya xi cachjá ne, hveen mé xi tichjá. Titjun ne, cahndē xi chja cjua tsujun peru quihndē ne, cavutsejen cojo cjuaquixi xi jemu jyē hnga ngayun. Vēhē xi sahmechuva yojo naha hane sava ná xi cuatjin cachjá.

Sehe cachja Nina cojo Elifaz ta cjan me cojo catsijyan amigu jan ta cjua xi cachja me tsöhë Nina ne, hacuiin cjuaquixi sacuaha cachja Job. Cachja Nina xi meje rë xi jyan cha vë cjuaha cha ngu chu, hane tsiquehen cha chu jan sacuaha cjuatjo rë Nina. Hacuaha cjuehya me Job xi cuichjayumataha me Nina ngatsë rë jyan cha vë. Hya xi camá ne, cuatjin casahmi cha hane catsinchataha Nina cha.

Sehe casua nga Nina Job jo cuatjin sa xcusun cojo sa xi camá nchina me ngu ndiya nga. Hane yëjë xuta ne, ndaja cavëë me Job. Casacu rë me të sa quihndi. Hya xi camá ne, jemu ndaja cavatju me xcun cjuahñu rë me hane changá me hya xi cahme me.

### **Cjuatacun ndaja xi cachja cjua ngajñi rë xuta tjë rë Israel**

(Proverbios 1-31)

Salomón, me xi cavitexa nangui Israel ne, catsihindu me cjuatacun vi. Cachja me cojo nixti xi meje rë xi ndaja cuataharcun me cjua vi cojo sa xi ndaja vëë me.

**Suva xuta ngarca sahmitangun me cjuatacun rë me cojo  
xuta tsehen xi hndiin me cjuá rë ley; xuta xi faharcun  
me Nina ne, tjin rë me cjuatacun.**

**Hitsë sa ndaja xi mangucacun xuta cojo xcusun xi  
sahmi Nina, xi cuma rë xi mangucacun suva me cojo  
yojo rë me ngatsë rë xi quicun suva me.**

**Meje rë xi nguñajatacun mangutacun cojo Nina, hane  
nihñu xi meje rë me cahndë xi nihñu mé xi ma nuju xi  
ndatjin. Hacuaha tuhun rë me cahndë xi cuitexa me yun  
hane sahmi me xi cuangun quixi cojo ngasunhndë nuju.**

**Nihñucuendun xi sahmi Nina yun castigu ta sacuaha  
sahmi ngu nahmi castigu quihndi rë me ngatsë rë xi  
hmucacun me quihndi vë ne, hacuanitjin sahmi Nina ta,  
tséhë xi tsihmucacun me xuta rë me, vëhë xi sahmi me  
castigu.**

**Tsajin mé xi nihñu cojo ngu chjuun xi cuiteña na yojo  
rë na. Ndaja cuinechun cojo chjuun nuju hane hacuiin  
cojo chjuun xi haçjahi.**

Hitsē sa venguichji rē xi nihñu ngahñu xi sacu nuju cjuatacun xi cuma rē xi nihñu ngahñu xi sacu nuju tujún o tuseti.

### Hacuaha cachja me cjuatacun vi:

Hya xi tsejen xi ngu quihndi tjin rē cjuatacun ne, jemu sua ma rē naa rē cojo nahmi rē. Peru hya xi jemu ngarca sahmi ngu quihndi ne, va ma rē me.

Ngu xuta ngarca ne, xi má rē me ne, tjin rē me chuva rē, hane vëë me suva me cjuaquixi; peru ngu xuta xi vechu cjuatacun rē me ne, cuihndë me cjua xi cuichja xuta cojo me.

Ngu nahmi xi sahmii me castigu quihndi rē me ne, xi cjuaquixi ne, miji rē me quihndi jan. Sa xi meje rē me quihndi jan xi cjuaquixi ne, sahmi me nguyjë xi ndaja sahmi quihndi jan.

Ngu xuta ngarca ne, macjain rē me yëjë xi cuichja xuta cojo me, peru ngu xuta xi vechu cjuatacun rē me ne,

tjun cjuahachuva me cjua vë, há quixi, há quixi, hane  
sehe sa xi quixi jain ne, macjain rë me.

Ngu cha jeya ne, jemu tjin rë cha cjuatacun. Ngu cha xi  
xti rë ne, ngutjen tsejen xi jemu yumahasen cha.

Sa xi tjin yo xi cuichja cjan cojo ri, ndaja nicoye cjua rë  
me cojo cjuajeya hane cojo vë ninguixin me. Peru sa xi  
nicoye cjua cjan rë me ne, hitsë sa hñu cumacjan rë me.

Hitsë sa ndaja cuetjun naja sa xi chjaharcun Nina  
handasa xi yuma yaan xi cuma rë xi nchina ngayaan  
peru jemu tjin naja cjuacjintacun. Hacuaha hitsë sa  
ndaja cuatju xuta ngu ndihya handasa xi suva ndeya jinë  
me peru tsihmucacun me xicjin me xi cuma rë xuta ngu  
ndihya xi ndaja jinë me peru choho vëë me xicjin me.

Xuta xi xta me ne, tjin cjuaquixi xi sacu rë me ngu  
xusun ta hatuxa sacu rë me cjuacjintacun.

Hitsë sa chja xi ngu xuta scaa rë me cuitexa me  
cjuatacun rë me hya xi cjan rë me, xi cumá rë xi ngu cha  
capitán sindadu scaa rë me xcun ngu si jyë.

**Handasa jemu ngarca ngu xuta, sa xi chuva cuichja me  
ne, tsejen sacuaha xi cuechu cjuatacun rë me.**

**Xan rë uva ne, ma vindacha hane yahnga nandá cjan jan  
ne, sahmi cjan rë xuta. Xuta xi jemu cjue tjengui me ne,  
tsajin rë me cjuatacun.**

**Hisca ngu quihndi ne, fahacuenda xuta xcusun rë cha sa  
ngu quihndi ndaja o sa ngu quihndi xi hnidiin.**

**Hya xi tjin yo xi choho casahmi cojo nuju ne, caveni  
nihñu ngojo vë. Nechunyun hane sahmi Nina me  
castigu ngatsë nuju.**

**Jemu choho vëë Nina xuta xi hacuiin quixi chuva xi  
tsichuva me xcusun xi cuiteña me, chuyiin rë me xi  
cuindacha me xuta.**

**Hya xi cuangun ndava ngu xuta xi jemu venguichji rë  
me ne, xicachjuun ngu cahndê xi matitjun. Hitsë sa  
ndaja sa xi cuichja me cojo nuju xi cuangun chjuhun  
ngu cahndê xi hitsë sa matitjun xi cuma rë xi cuma sava**

**nuju ta cachjuhun suva ngu cahndê xi matitjun xi satiin  
nuju.**

**Sa xi sacu nuju tsjen rë chu sera ne, chinu peru hacuiin  
cuatjutaha chinu ta sa xi ma tsihi nuju.**

**Sa xi nchunchujun ni cuangun ndava xuta nuju ne, ña  
sengui rë me yun.**

**Hya xi tjin me condra nuju xi vojo rë me, tuhun rë me  
niñu; hya xi xinda rë me, tuhun rë me nandá. Xi cuatjin  
nihñu ne, masava rë me hane ndaja sahmi Nina cojo  
nuju.**

**Hitsë sa ndaja sa xi ndaja nechun cojo chjuun nuju ngu  
ndihya nguijña xi cumá rë xi tjin nuju ngu ndihya  
ndajyihi peru chjuun nuju ne, jemu chjataha na yun.**

**Hya xi cjuehe cjua xi chuya naja tséhë ngu nangui cjin  
ne, tangun sua ma rë xahesen naja sacuaha sa xi cahyun  
nandá hnchan hya xi xinda naja.**

Hya xi cuesu rë ngu chu naña ne, cuya sinë chu vë ni.

Tangun cojo xcusun rë xuta ngarca ta xcusun xi  
catsichaja rë me, cuya sahmi me.

Ngu ndihi ne, meje rë chaquin xi cuma cueti hane hya xi  
tsajin ne, hvo vë. Hacuanitjin má cojo ngu si xi sahmi  
xuta cojo xicjin me ta hya xi tsajin yo xi cuichjatë me  
tséhë ne, cjuë cjuachan xi tjin.

Cachjuun cjuacjintacun tséhë mé xi cuma nchujun ni ta,  
tsajin yo vëë rë mé xi cuatju cuma.

Hitsë sa ndaja sa xi ndaja xi cuichja xuta favor tsujun xi  
cuma rë xi cuinújun suvun.

Xuta xi miji cuihndë me cjua rë Nina ne, hacuaha choho  
nuhya rë oración rë me.

Yo xi meje cjuehma xi casahmi ne, tsajin mé xi ndaja  
cuetju tséhë. Peru yo xi cuijacun jyê rë cojo Nina ne,  
sacu rë cjuaninchataha cojo cjuayumatacun.



